

嘉慶直隸太倉州志

直隸太倉州志卷三十六

人物

文學

二

太倉州

國朝

王瑞國字子彥世懋孫士騷子弱冠中天啟元年舉人  
東修砥行吳門文震孟姚希孟折輩行與交周順昌羅  
璫禍褻金急其難馬世奇殉國設位誄以哭之性高簡  
寡嗜好研精書史無曷刻閒爲古文出入歐曾二家  
國朝順治十年授廣東增城令三載告歸築壑研齋著  
述以老

朱汝礪字商石明諸生少遊張溥及吳偉業門有志行  
爲書數千言規當世事爲文瓌麗髣髴偉業 國朝知  
州白登明聞其名延輯州志未成稿藏於家

王家祥字止吉州庠生博通典籍尤精於天文地理知  
州白登明設書院于沙溪曰樂只堂延爲院長弟家禎  
字予來少孤與呂雲孚同研席張溥見其文奇之引爲  
弟子入 國朝吳中文社並起爭致之家禎不樂應也  
生平勤著述年七十自序云窮老氣盡紙乾墨燥而不  
自己於天人古今大要多所闡發其自負如此同時陳  
嘉字靜夫文與家禎埒師事黃淳耀淳耀歿撫其遺孤  
有古人風

周肇字子俶五歲識奇字至十歲爲文師堯異之張溥  
舉復社肇以總角爲高弟貢入太學順治十四年順天  
鄉試舉人時科場事起同考官論死肇親爲治殮兼以  
橐餽濟其家四經 御試久之得青浦教諭舉卓異陞  
授新淦縣令時肇已病力疾之官以除弊恤民爲政亡  
何卒年六十九肇盛有詩名吳偉業常選同邑諸人詩  
名婁東十子十子者肇及王揆許旭黃與堅王撰王吳  
王抃王曜升顧涓王攄也

王揆字端士時敏次子順治十二年進士應以推官用  
因養親不出能詩康熙十七年 詔舉博學鴻詞巡撫  
慕天顏疏薦力辭通籍四十年雖未入仕而志切民生

如蘆洲稅課蠹弊力請當事釐之劉家河久淤上書巡撫爲之浚鑿以長子原祁貴累贈資政大夫卒年七十一弟撰字異公時敏第三子性溫厚工詩善隸書及畫年八十七卒抃字鶴尹時敏第五子天姿英邁神采斐然爲詩善樂府體卒年七十五攄字虹友時敏第七子善屬文最工詩好獎勵後學鼓吹風雅與兄撰抃皆監生

許旭字九日國榮孫年十二應童子試時學使盡絀幼童得旭卷奇之補庠生鼎革後壹意爲詩古文詞與周肇黃與堅等齊名范承謨巡撫浙江聘入幕章奏皆出其手及承謨以總督入閩耿精忠將爲變諸所贊畫多

天下大計難作承謨殉節精忠怒旭等甚執諸在幕者  
徧鞠之必欲得旭而甘焉旭以先歸不及於難

王昊字維夏世懋曾孫父瑞璋孝廉以心疾廢昊弱歲  
能古文詞與四方名士爲文社交遊幾遍海內後以奏  
銷案廢一意讀書丹黃甲乙無虛晷所撰當恕軒偶筆  
時稱博洽康熙十七年舉博學鴻詞 廷試授內閣中  
書 命下而昊已先數日卒矣弟曜升字次谷與昊  
齊名性豪邁脫畧公卿跌宕文史亦奏銷望謫悒悒不  
自得東南西北惟意所之遇酒輒或歌或哭以消其塊  
礪暮年遊京師卒

顧澗字伊人本程姓父新令惠安與顧夢麟善夢麟無

子幼鞠湄遂姓顧氏早通經義十二歲作爲上者與民  
爭利論宿老異之師事陳瑚爲高弟慎交同聲社興皆  
以得湄爲重值奏銷呈誤絕意進取專力詩古文徐乾  
學慕其名延館於家時爲納蘭成德刻通志堂經解其  
較正爲多

鄒錢斌字兼侯年十八爲諸生工書善詩古文辭常客  
崑山葉氏徐氏所與倡和皆知名士也歷游秦晉間所  
爲詩文日多有延月草堂集年六十五歿於家無子集  
遂散佚從孫仁實求之親故家僅得近體一卷又傳子  
智方孫淳文江寧張復純始爲作傳

陸榮字右桓孳生長陞榮次之性孝與兄友愛撫亡妹

孤若已出爲文峻潔試于嘉定以舅氏籍爲縣諸生順治八年拔貢 廷試以知縣用旋丁艱服闋應選北上中風驟卒年五十

吳澣字九滌性孝友博聞強識歷遊江楚手輯洗心子集百餘卷歿之日諸門人與王御諡曰貞憲先生

錢嘏字梅仙陳瑚高弟學有原本遊四方必奉父母木主以往所至焚香上食事之如生著鄉飲禮辨家禮彙參三吳水利議後遷虞山卒

王時儁字秀升璣子嫻詩古文秉性恬淡族子貸金將死以田償時儁曰如後事何給直以殮嘗歸外家贈產拾遺金以還主証門樞振聲以全人閨行禁蘆根針刺



以任隣收芻晚號省微子舉鄉飲禮年八十一子拱字  
紫中年十三補州增生生平力行善事夏楫冬棉施捨  
不倦以季子歲貴受 贈中憲大夫廬州府知府長子  
大受字佐才諸生攻文精小品早卒亦以子文徵 贈  
文林郎海洋縣知縣

崔華字蘊玉順治十七年舉人新城王士正分校所得  
士也極愛重之博通經史兼工詞翰詩名擅一時有句  
云丹楓江冷人初去黃葉聲多酒不辭人號爲崔黃葉  
康熙十七年舉博學鴻詞徵不起年六十餘卒

王桓字虎臣州諸生少遊尤侗歸允肅之門博覽羣書  
刻意爲詩與葉藩呂楠友善唱和甚密所著詩藝文類

王聞炳字蔚儀先以許文炳名爲蘇州府學生後復今名生時有彩鸞入夢之祥聰穎過人孝友誠慤及長績學能文王挾其受業弟子也卒年六十有三

黃侃字孝直州學生好學尤肆力於古文王挾任浙江學政延之入幕衡文所著詳藝文類

顧士璉字殷重州諸生練達時務劉河淤三吳連困於水當事議浚以費繁阻知州白登明用起圩法先疏朱涇繼疏劉河用士璉議也後吳中潦撫藩復議疏劉河淤段延士璉問策士璉請仿海瑞折漕例約以四萬兩浚淤段五千丈建閘天妃鎮以利蓄洩至今賴之康熙四十三年大旱民無以完漕士璉與何寧國陸世儀江

士韶曹周鈞王發祥等叩 開請折州民醵千金爲費  
既得請費悉散還之生平以澤物爲念拯難濟急有國  
士風爲文善條晰事情又講求性命之學至老不倦年  
八十有四卒

吳翊字振西繼善嗣孫穎悟過人工帖括爲諸生試輒  
冠曹其詩清妙成一家言徐乾學致仕歸奉 命編

輯一統志及宋元通鑑開局於洞庭東山集四方名士  
纂校以翊爲最康熙五十一年成進士需次內閣中書  
以疾卒年六十

葉藩字桐初祖某父中密皆死於兵母陳氏撫之成立  
有詩詞名宜興陳維崧序其詞及長終身不試爲黃岡

杜濬所器愛濬妻以女客遊四方名公卿爭延禮之晚  
客涿州卒於旅次年六十呂楠哭以詩云一棺雨雪三  
千里八口飢寒五六年蓋憫其遇也楠字三雷號雪州  
隱居授徒陳瑚等舉淮雲詩社楠爲眉目其宗法程嘉  
燧有編蒲稿洗硯錄是亦文集華乾龍序之

曹漢字倬雲順治十四年舉人以奏銷被黜既而病卒  
有詩曰琢齋草

朱顧廬字儀臣州諸生潛心理學陸隴其嘗評其文爲  
七郡之冠自署其齋曰顏樂以見志采輯薛瑄高攀龍  
顧憲成陸世儀錢坤五子書以繼宋儒語錄從子慎字  
敬旃亦州庠生幼岐嶷長力學顧廬授以經書砥節礪

行授徒講學畢沅其弟子也既歿其舅沈起元爲作行  
畧子體和諸生承家學著大易經傳釋

浦泰本姓謝字心傳州諸生爲人篤厚屏絕浮屠淫祀  
與朱顧廬同講理學輯四子書講易爲闡注儀封張伯  
行序之又輯毛詩闡注子安瀾字湧清自幼敏悟乾隆  
二十一年鄉試副榜考八旗教習選祁門教諭居未二  
載引疾歸卒年八十有三

周世樟字章成州諸生醇謹好學明天文禮樂窮居教  
授著五經類編王揆序之年七十餘自知化期索紙筆  
書日時召親故話別至期果無疾卒

毛師杵字亦史澄從孫州諸生工詩客游四方會秦鉅

註誤棄舉子業益精於詩如臯冒襄闢水繪園招致四方名士師柱與焉時王士正爲揚州推官來修禊觴詠酬和相得恨晚也晚歲倦游杜門吟咏益富族弟師彬字魯封詩齊名兼能繪事

陳炅字穎永性敏捷爲文章操筆立就研鍊如宿成康熙五年舉人十八年選武進教諭二十年分校浙闈常州郡饑炅分司賑務規條井井改高郵學正黃淮決捐金煮粥以餉士子所全甚衆告歸後嘗著敝衣冠往來雖毫不乘肩與人叩之曰有臨之在上者心嘗兢兢耳王曾武字宏導發祥子年十三補州庠生奏銷呈誤以貲入太學爲文博茂詩尤淵雅曾武性和而介不爲奔

競每謂學問人品科名一毫假借不得御史裘允美以  
博學鴻詞疏薦不就亦不造謁卒年三十四

周象明字懸著康熙十一年舉人幼工制舉業尤精性  
理家貧以脯脩自給人挾貲求聯族曰是亂宗也不納  
有從弟以逋糧自鬻象明積貲贖之旣而復然卒歸之  
終身贍給焉臺司聞其名飭州牧延象明登明倫堂講  
尚書洪範及昔賢主敬之學聽者感服沒祀鄉賢祠  
倪遇字元夫州庠生性耿介嗜古時婁東十子詩風行  
於世遇獨上宗韓孟旁及蘇黃嘉定王梓見而異之相  
與結契倡和無虛日然遇卒以窮困死遺稿散佚後梓  
子恪於錫擔及僧寺敗篋中集得數百篇序而藏之

顧衍字蓀臣父光復字宜遠康熙二十年副榜衍少讀父書英邁好學豪於詩酒不屑屑拘邊幅遊京師薦入奇門館修書南歸後客遊東粵秦閩著作益富兼畫山水其友徐玠玉字漢光憲卿孫詞華與衍相埒嘗邀同學十二人分花賦詩王玃圖爲長卷以傳之衍子枏字南季縣廩生豪放有父風從兄陳塋比之馬氏白眉能詩詞工駢體文卒年六十七

唐孫華字實君幼有神童之目遊京師名公卿爭延禮之康熙二十七年成進士選陝西朝邑知縣會

上問博古之士閣臣舉以對 召試詩賦稱 旨遷禮部主事調吏部考功司三十五年充浙江主考官嗣以



望誤歸孫華體貌清癯博聞強記言論風采傾一時尤熟於史事人有叩輒口竟原委數十行如注爲詩古文引筆灑灑千言不竭年旣耄窮經日有課程居鄉遇事輒昌言得失嘗謂蘇松民力宜恤官司虧空宜寬州縣城隍宜修浚欲寓書於大學士朱軾會疾作不果卒年九十

陸建運字慎三康熙二十九年舉人工時文何焯亟稱太倉吳陸吳謂給練畷陸卽建運也書法學懷素人爭購之藉以自給爲人廉淡寡諧自號曰常惺又號曰白業山人卒年七十

龔秉直字敬立州諸生少負異才遊王揆之門每歲科

試常冠儕偶詩歌閎博一時有名士稱所著石帆集唐  
孫華序之

王遵展字箴六父扶爲時敏第六子少孤力學補州諸  
生與族叔時翔族兄恪顧陳埈數人晨夕相劇切康熙  
五十一年成進士改庶吉士時叔揆爲大學士遵展寓  
相邸慎接納惟與嘉定張雲章桐城方苞寶應喬崇修  
金壇王澍同郡楊繩武交契明年授檢討引疾歸里又  
一載揆奉

命總裁春秋因薦遵展分修至京益罕  
所酬接當是時遵展從兄原祁官戶部侍郎奕清官詹  
事從弟奕鴻官戶部郎中從子暮官編修從祖時憲官  
檢討一門冠蓋輝耀日下遵展獨蕭然無宦情春秋成

力辭疏薦而留侍郎第者十年至雍正二年始歸歸時  
揆贈以詩有云國是資高見家艱仗遠圖蓋是時揆以  
密疏請建國本罷任尙留京而原祁已謝世暮視學  
陝西奕清及奕鴻先後奉命赴北路軍臺揆杜門

謝客朝士無復起居者戶庭閒然惟遵展時慰藉之及  
歸里子孫天殤揆函問亦至遵展俯仰盛衰悲痛愴惻  
家居日困則舉向日所嗜法書名畫古磁玉器悉棄以  
自給又每念揆爲宰相十年歿後孤櫬在室未就窆窆  
昆弟垂老滯邊無歸期時時獨飲泣遂得疾所居晚清  
軒老梅屈曲如蓋後枯遵展指之曰此樹生意盡矣我  
能久於世耶未幾而卒年六十有七子俊閔鄉縣知縣

嘗貽書戒之以爲治不宜悖今亦必不可戾於古水旱  
災荒大利害所在不宜存避難就易之意倭奉教務爲  
清白吏故遵展晚歲益困俊見治行傳

吳彥遵字思緒暕子弱冠遊京師作燭賦及今昔遊詩  
百韵名動京師康熙五十二年順天舉人揀選知縣發  
福建試用署南安縣以清查錢糧不及額論罷總督高  
其倬奏留調建陽鋤豪强平徭耗歲大旱禱雨蓋公泉  
立應邑稱治俄中飛語再被劾事白補湖北巴東母憂  
未赴服闋得四川之樂山寧人息事如治建陽時又會  
忌者搆之投劾歸里居七年卒彥遵有才幹性介且傲  
在建陽清理勾荒虛糧二案任樂山陳請疏濬雅河故

道績尤鉅子維鐸字廉夫乾隆十八年舉人學問淹博工詩文未仕卒次子維鎬字鈍夫乾隆十七年舉人後入貲選雲南新平縣知縣旣調順寧署永善以失察鐫級回籍卒從姪詡字砥庭幼有神童譽詩文敏妙以名諸生稱皆本家學也

王旦復字賡旦錫爵四世孫軀幹戍削貌亦似之幼以能文名康熙五十三年同子玃舉順天鄉試世業春秋精於三傳性澹泊燕居敝衣客至不易人稱其介以玃貴封主事著續春明夢餘錄弟昭被字葆光康熙四十五年進士任福建龍巖縣知縣有政聲以卓異行取入都旋移疾歸貧窶如諸生

王策字漢舒諸生少年韶令才辨不羈時邑中多言詩策獨酷嗜倚聲檢討尤侗賞其秀異邀主其家所著香雪詞一以張炎王沂孫爲宗偶效辛棄疾劉過及柳耆卿周邦彥非其至者也

錢一清字宇瞻 贈戶部侍郎坦之孫康熙五十三年順天副榜幼穎異長擅文譽前輩咸以國士目之澹於進取歸偕兩弟奉母以色養稱承先志創宗祠誠子弟以忠恕卒年五十四

張月鹿字思遠州諸生髫齡能文事親色養喪祭無違禮祖祠向在鎮民橋旁 國初遷木主於家土豪欲佔其地白於巡撫重葺之唐孫華爲作記至建丙舍修家

乘賑親族皆有古人風授徒講學從遊者多爲名諸生  
訓子義方諸子先後遊庠督課不少假喜吟咏卒年七  
十有二

沈受宏字台臣州貢生年十二能制舉義十四能詩已  
而受業於盛敬研極性命學乃大進吳偉業奇其才授  
以作詩之要名日起同里王揆及長洲繆彤俱以詩文  
相師友遊京師公卿折節下之家貧父母俱失明受宏  
奉養以孝聞撫弟妹及孤姪恩備至又爲宗會禮合食  
收族喪葬不用浮屠年七十八卒以子起元貴 贈江  
西按察司僉事祀鄉賢祠

王恪初名慮字愚千祖泰際見隱逸傳父梓字啓林幼

穎悟絕人吳偉業贈泰際詩正禮雙龍方矯角釋奴千  
里又空羣者也中年以目眚不果用世梓常攜恪至太  
倉沈受宏見而器之字以女遂占籍應童子試學政許  
汝霖目以國士中年遊京師新城王士正長洲韓荻亟  
賞其文而尤爲同宗相國揆所知然性恬退至康熙五  
十七年始成進士以知縣用發往直隸歷署繁劇後補  
唐縣廉愼自持清軍屯緝志乘所至多善政以繼母年  
老乞歸應聘主西江豫章書院恪沈靜無嗜好惟汲古  
勤學終身無閒著作甚富年七十卒長子星字靜占州  
庠生有俊才早夭幼子崇字德季太學生性醇謹刻父  
遺書行世所著俱見藝文類



黃祖顥初名遷字頊傳以長洲籍爲廩貢生幼雋穎有才名爲文汪洋浩蕩士大夫推之事親孝藉束脩以供甘旨夜有私奔者力拒之見道旁患瘍棄兒養之愈使去長洲有富人借其名以避役祖顥不知也及歲試以新例見斥王掞爲翰林時招之改今名入太學卒年四十

毛序字東球天麒麟子博涉經史工吟咏與兄子健互長詩社王言武目爲大小毛屢試棘闈不售以子之玉覃恩誥封奉政大夫監察御史之玉字用羽母王吉武之妹嫻吟咏之玉稟家學少工詩文雍正八年成進士改庶吉士授編修充文穎館纂修官考選河南道監察

御史乾隆元年疏請抑奔競除訟蠹是秋 恩科充順  
天鄉試同考官署掌山西道事丁外艱後以事左降服  
闋不復出主虞山書院歷十四年造士頗多晚居里中  
不與戶外事知州同年趙錫禮縣令金鴻先後以邑志  
相屬年八十六卒詩仿眉山劍南填詞尤工梁谿杜詔  
推爲江左第一子詠字宣夔乾隆十三年進士改庶吉  
士授編修纂 國史十七年原官回籍歷主常州龍城  
書院婁東書院以喪子鬱鬱不樂遽疾卒天性孝友與  
人交坦易無城府詩古文宗法歐蘇與邵嗣宗齊名人  
稱毛邵兼精醫術歿後諸生立祠城南歲時祀之  
毛張健字今培州諸生入貲貢成均三爲學博後補祁

門不赴喜獎引後進有唐詩選自謂得不傳秘晚好爲詩餘工妍如唐人

趙貞字松一工詩文當道爭羅致之性清澹工言詞饒晉人風致

王時憲字若干康熙二十三年舉人至京師時徐乾學方負天下望名士爭出其門時憲獨以後進禮見困公車久由中書改授宜興教諭尋聘校浙闈四十八年成進士及館選

上曰汝爲宜興教官耶蓋以丁亥南巡時獻詩

上猶記憶也遂改庶吉士授檢討五十六年主陝西鄉試年六十三卒於官平生著述尤遠於詩所擬陳思王

樂府朱彝尊稱爲江左獨步

張泰基字大復明尚書輔元孫母顧氏善吟咏幼孤稟母教能文弱冠補諸生康熙四十六年南巡獻詩

稱 旨雍正元年順天鄉試舉人明年會試不第

賜進士改庶吉士年已六十六矣三年出知景州值歲饑勤賑濟蒞任百餘日以事落職歸

姜天章字漢昭少貧苦耽於詩生平爲童子師晚年妻亡無子存江西集詩二卷雍正六年臨終授其友蔡宏及卒宏刻之

王麟來字玉書在晉曾孫年十六補府庠生試輒高等康熙五十六年中副榜充鑲紅旗官學教習需次縣令

疾歸道卒詩文別有奇氣子漁字硯深州學生負不羈材嘗贊修鎮洋縣志人共推其淵博曾孫金詒以純孝天死其父思濟屬王瑜作傳紀之

曹扶蒼字鴻儀州庠生性夷曠澹於聲利好爲詩古文灑灑數千言居家以孝友忠厚謙和訓子孫年八十七卒

王肇字建初隱於市王琛字來珍隱於醫皆布衣比屋而居日夕倡和州中勝流名士以詩酒相集二人不預焉然婁東稱詩人者必及西門二王蓋所居在城西故云

錢壽字長流州增生明巡按桓裔孫居家孝友務實學

少工於書臨摹諸名家咸通肖晚乃自成一家又得養生真訣耳目聰明嘗語人曰清心寡慾四字一生受用不盡卒年七十有五子本誠字胄伊雍正五年進士改庶吉士授編修十年典試廣東乾隆三年復典廣西皆稱得人尋充日講起居注五朝國史三朝實錄館纂修晉右春坊贊善以親老乞假歸省次年卒年四十九本誠畱心經濟在詞館日嘗手疏當世利病爲一書名待致草弟枝桂字林一有文譽雍正十年舉人揀選知縣未仕卒

王良穀字是樵緝修子能詩文善書爲名諸生歷陝學署及粵東燕晉藩幕以王墓薦命往浙江試用屢

攝劇邑有政聲補富陽縣潔已奉公民安其治三年引  
疾留心桑梓事浚河工輯縣志多所贊助子劬留字思  
聖州庠生豪於詩酒有父風勸留字邁生縣庠生亦工  
詩父沒哀毀咯血卒勸留子昭麟字公符州庠生工詞  
章少與王瑜王思濟有城南三王之目遊京師由國子  
生充四庫館校錄選浙江龍遊縣丞調太平擢知縣攝  
龍遊西安臨安常山東陽五縣奏補江山所至有清白  
聲尤愛士東陽諸生葉綦者貧甚知其才厚贍之使就  
學省城書院歲餘成進士在江山多善政書法見重於  
時天台雁宕間碑刻往往出其手後以坐誤罷歸貧至  
不能自給卒年六十

陸宏緒字百和雍正元年舉人乾隆七年會試取明通榜選太平縣教諭陞羅源知縣廉潔奉公以親老致仕歸工於詩卒年六十六次子元達號若泉乾隆二十五年順天舉人官當塗縣訓導以培植人材爲己責年六十卒於官四子元邁字沁雪乾隆三十年舉人有文譽與王瑜毛上良朱濬等結詩社後屢不得志于禮闈依其叔源於泗水縣任卒所著皆見藝文類元邁子模孫乾隆五十二年進士

顧廷桓字雙栗雍正元年順天舉人爲文清駛游京師光祿寺卿李紱亟稱之與其兄陳埈孝廉有二難之目屢佐學幕納交皆知名士又嘗授徒洛陽主講聚星書



院時同里沈起元爲河南按察使延課其子及擢直隸布政使復從至保陽年六十一卒

凌士錫字綏章幼孤力學州學生雍正元年拔貢四年中舉人屢上公車不第自謂非用世才遂無進取意性寧靜閉戶讀書臨財不苟事母孝里人稱爲真孝廉

胡嵩字右階雍正元年舉人性介潔制行雅飭早孤事母以孝聞生平不妄交工舉子業嘗往來武林雲間縱游吳山西湖及九峯三泖有所觸必形于於詩四上公車不第卒年五十

張德肇字儀仲歲貢生詩文稱擅場嘗舊萃經史字典鎔成五言韵語正舛訛明條貫分門別類傳於藝林性

孝娶室日帷帟母皆手自泝澣德肇珍之令妻澣垢補綴弗敢易也父所束布條亦終身藏之篤友于課其弟卒爲諸生又以自置田畝均之有從弟失業亦教養至於能文一從祖沒後四柩在淺土俱歸葬于先塋晚年遍游名勝搜采金石年八十餘卒子桂曾字孝芳縣庠生

陸岡齡字疇五雍正二年舉人揀選知縣改就教職文章行誼爲流輩楷模當事聘爲鄉學師邑俊耄多從之游旣沒爲設祠西關外祀之

王英字懷一性廉介詩文雋逸由常熟縣庠生入太學雍正二年順天舉人乾隆二年會試取明通榜除旌德

教諭訓士有方以卓薦遷涇陽令屏苞苴清案牘擴書院擇良師以教之未幾移疾歸里居十餘載教授自給年七十九卒

朱振玉字彙九雍正四年舉人性端介爲文匠心獨造生中諸少年爲文社求定甲乙折服逾其師至性過人會試旣入闈忽心動卽棄卷出兼程而歸則繼母病革不起遂終身不上公車造就來學方矩闊步以師道自任揀選教諭未及仕卒年六十有七

陳福字全五年二十餘始發憤爲學閱覽博洽能文章兼長陰詠康熙五十年副榜貢生雍正四年舉人十一年成進士授元氏縣知縣旋以老病去官

胡張翼字禮恭縣諸生弱冠有才藻父早喪藉館穀以養母授徒隨材善誘爲人外和內介里黨咸以長者目之卒年六十有四

王愔字存素州諸生性情高簡工詩清微澹遠以王章爲宗尤工於畫入原祁之室五十外耳聾而意興不衰在吳門踵門乞畫者如市皆渾灑應之長子名廷銓號蓼菴亦州學生博雅能詩晚歸淨業通釋典有牧牛餘錄等書移居吳縣之楓橋次子寶林字淵如喜吟咏傳畫學沈德潛贈詩云兒曹亦擅南宗派絕似書家義獻之早卒

王時翔字抱翼年十三始就傳一年通易詩書工詩賦

補州庠生作三史摭言纂輯諸經箋注義疏雍正六年同里沈起元薦授晉江令歷政和甌寧爲政清簡遷漳州府同知以疾歸乾隆元年召起蒲州府同知三年陞成都府府在省會滿漢軍民雜處時翔練達庶政多所回輟在蜀九年年七十卒於官時翔以詩詞名世新城王士正咨賞以爲秀絕子景元監生稟承家訓績學工文孫澄癸卯舉人澧渥廩貢生

朱叙字端揆弱冠補諸生篤嗜典籍與沈起元王時翔遵展相友善雍正七年以起元薦赴部投牒念母切忽心悸遂告歸撫弟妹有恩養與人交不欺然諾詩文皆有師承書法學米襄陽

顧駿業字蘊生年十五而孤旣冠聞舍西鄒魯望與同學爲考課往從之相與切劘遂補庠生作小詩超然拔俗沈起元深器之卒年五十一

鄒以敬字魯望 國初貢生鄒震謙之從孫家學相承研經義精於三禮尤究心道學約同人爲講會沈起元顧陳埈咸稱之又嘗與王嵩郁臺王恭顧成志相倡和每日必以讀書所得者記之有常惺齋劄記今存其半至史論八卷詩古文九卷均佚其弟子蘇加玉云

陳鉉字宏猷少讀松陽講義慨然有求道志家習農年十五父命之耕欣然就耒曰事所當事卽真學問也少休便勤讀鄉居教授著四書晰疑就正錄學政尹會一

雷鉉皆重焉招之入幕沈起元亦數與往還講學卒年七十三歿後詔纂四庫全書弟子王濤上於有司錄入書目

方青選字範西州廩生髫齡失怙恃祖撫育成立益奮於學以歲貢生選授沐陽縣教諭地僻而瘠士不志於科名抵任卽勤課諸生貧不能赴試者贈之貲嗣是多獲雋者邑有桑墟鎮貯麥備荒大吏檄委給賑所貯腐敗亟請以粟易之忤有司勿恤也居七年以老告歸卒年七十有九

王嵩字頴山州增生端雅有志節少學詩古文於其叔時憲時翊名譽日起沈起元尤所嗟賞官江西河南直

隸時輒邀嵩往資其贊畫既歸益刻勵爲詩嗣響中唐  
知州金鴻聘修縣志商定各門多出嵩手從弟輅字素  
威涇東文會昆弟稱一時翹楚輅尤工詞見賞於毛張  
健顧東埽謂得姜史之遺

楊宗時字繼山子龍子雍正十三年拔貢生有文譽下  
帷刻苦尤喜吟咏卒年四十三

周鼎字亦我州學生性穎敏通經史行文下筆便成如  
鳳構學政重之延之入幕晚年教授生徒以闡發經義  
爲宗雍正十三年恩貢子之軾之轍之載皆有名諸生  
間之轍字希穎未冠補縣學生乾隆六年以五經中式  
公車歸始授室未幾卒



吳學尹字萃來御史之彥曾孫爲州學生砥礪廉隅士林推重工時文詩和平剴切門人程穆衡輯其遺稿藏之

呂徐行字子循家貧好學長工文章研究心性年三十二始爲州庠生旣而食餼親老授徒以供甘旨撫兄遺孤教養如已子敦友睦鄰族黨無間言年六十有四歲貢至七十一卒

王鈺字兆堅幼承家學廩于庠久之歲貢家素貧事親以孝聞工楷書爲文法先正里中咸師事之年六十有九選安徽青陽訓導未及赴而卒

曹家珍字鈞植州諸生御史遼後裔性剛直落落寡合

工詩尤肆力於天文地理精醫能起沉痾作仲景集注  
接輯沙溪志卒年七十一

吳德怡字順之州廩生偉業之孫賦質簡重嗜學乾隆  
元年 詔辟孝廉方正當事舉之以疾辭不赴父暄官  
壽張縣知縣留視家事曾有句云全家憑客計世業以  
文鳴其志如此學博而精尤熟宋儒諸語錄卒年四十  
八

林晃字啟明歲貢生少有雋才授生徒皆有法則而持  
躬醇厚叔穎秀老而無倚養之旣歿撫其孤孫成立季  
叔德宇歿子不振時周其匱乏卒年七十有四所著甚  
富詳藝文類

五  
卷三  
三  
沈桐字若干歲貢生幼穎悟年十二經書卽能領大義  
爲文以清真雅正爲宗尤肆力於性理

陸松齡字鶴芬州諸生爲人有矩矱積學工文續修沙  
溪里志

曹徵熊字協占州學生幼孤力學性耿介不投時好及  
門有小過必呵斥之

呂琳字幼輿字學師傳多所承藉爲名諸生綏德馬豫  
視學三浙延之入幕尋度嶺涉羅江訪友粵東無所合  
而歸

王士登字民綱州學生粹于性理授徒闡發經義又工  
詩以陶爲宗年七十一卒

張應祖字劬嗣州諸生少循謹刻苦爲文詞嘗思宋儒  
言人子不知醫比於不孝乃潛心醫術有名輒應必偵  
其效而後卽安

沈壽眉字休魯歲貢生素爲從叔起元所重歷官所至  
輒邀與隨其訓後進以誠敬爲本制義要皆闡發聖賢  
精義乾隆九年知縣金鴻聘請修縣志與分校事生平  
耿介自持門無雜賓服食厭華美年八十三而卒

毛大年字耆蔭增貢生以第一補縣學生謁見日學政  
張廷璐勉曰汝卷最佳是能讀書者與侍讀邵嗣宗及  
弟之玉等聯文會人景慕之生平制行醇謹卒年六十  
六

徐夔字龍友父復揚州廩貢生由穿山遷沙頭鎮生三子龍友其長也長洲廩生稱詩吳下與沈德潛張錫祚爲莫逆交其詩初學韓愈晚學李商隱且爲之註與朱長孺時有異同年五十卒有西堂集歿於廣西學幕中故皆散佚德潛評其詩云龍友負才高俊讀書一二遍終身不忘茲所收皆向時所作讀之猶見其尊酒澆胸氣概也夔又嘗與惠棟撰王士正精華錄訓纂

徐亭字立山恩貢生爲里中經師從游者咸得所成就中年家貧脩脯外無長物然不屑爲攢眉態生平攻舉業脫手多散佚卒年六十八子緯乾隆五十一年舉人錢號字孟衡州廩生友教里中生徒雲集家本貧積金

葬父母居家儉約不苟取然喜周急著有四書五經就  
正編卒年六十有五

陸蔡字佩芳州廩生好經學尤邃於詩嘗作詩義質疑  
又嗜左氏有春秋傳爲文簡貴性慷慨周急家坐是落  
浙閩兩學政皆聘以校藝年五十六終

王寬字敬勇州廩生父烈積學砥行有聲士林寬師事  
周象明陸毅盡得其學來學者益衆構精舍數楹名栗  
園講讀其中卒年六十有三

王恭字禮言性恬淡棄舉子業深造於詩尤尙王孟沈  
起元序之稱爲作手南園本王錫爵別墅恭時尋往蹟  
集朋好觴咏其中晚年長齋修淨業自號破有居士卒

年七十有三

顧成志字心勿州增生襁褓育於張氏弱冠以張姓入學後復姓乃爲文告張氏祖諷子孫以張爲重名祭掃必兼承二姓幼嗜詩晚年益工卜居西塘結吟社卒年六十有七

邢桐字嶧陽能詩家世印溪年六十移居西城閉門却掃專事咏吟年近八旬得一子有草色餘言集王恭序焉

董大新字自芳歲貢生少穎敏試輒高等爲文根柢五經有文稿卒年七十六

陸履謙字尊光廩貢生考補教習三年期滿例選知縣

丁外艱歸服闋赴都奉

旨授兵部試用未及選又

以病歸卒年五十有八

胡坤字載培州學生年十三時沈起元主婁東書院以大器許之美丰姿身長玉立性豁達卒年二十有八無子弟豫字介石以商籍入錢塘學生時有二難之目先坤百日卒亦無後

凌燾字孝直歲貢生弱歲能詩文早孤稍長博涉經史爲文獨闢畦徑深情秀韻在筆墨之表名場推爲眉目間爲詩歌以自陶寫哀得意之作曰雲間自爲之序

吳嵩字翰周嗜學工文不應制舉愛名人書獨推張米芾晚年書益工求者踵至又精養生術踰大耋尙矍鑠



能燈下作楷字以無疾卒

恩賜八品頂帶子震墳

字補愚州學生嚴師範敬禮之卒年七十

邢之煥字玉藻州學生敦行慎交性恬靜工吟咏祖虞

音季父陶民本以能詩著之煥繼之有灌畦詩草

唐瑀字仙佩唐邾周顧爲雙鳳里四大姓瑀幼有承藉

運思深沈嘗至廣陵與諸名流賡和書法類九成宮雄

秀可愛

王濟美字繹元乾隆十七年副榜博學多通尤工制藝

得其傳者徃徃所試如志嘗佐學幕校文蜀中士論翕

服

黃玉蟾字芳桂八九歲盡通四書小學性理少長五經

周禮三傳俱能卒業操觚卽有奇句年十三補州學生  
因痞嘔血疾遂劇口占詩十二首旣絕復甦猶講天命  
之謂性三句復誦朝聞道夕死可矣二語瞑目而逝年  
僅十九

顧文成字董醇附貢生爲人伉爽嘗謂儒者以治生爲  
急寸銖累積家業漸饒訓子嚴戒以遠浮薄敦詩書以  
上承先澤卒年四十有七子駿德字冰璜歲貢生爲文  
章有法度

陸寅亮字縉直歲貢生父岳附貢生性篤摯以善書名  
家故素封盡出以購書籍沈德潛未第時過訪輒留旬  
日與談文藝寅亮侍側記之操筆立就中年造詣益精

以歲貢當爲教官未及選而終金壇王步青合刻寅亮  
與陸崑顧栗高賓毛商巖陸煒趙丕烈朱桓施涵何忠  
相文爲婁東十子商巖字紫滄煒字志先均嘉定人桓  
丕烈涵忠相栗崑賓皆別有傳寅亮又有古愚詩稿散  
佚未傳

高賓字誦蕭七歲能書大字弱冠爲諸生試輒冠其曹  
益肆力於古嘗與同郡邵嗣宗毛詠朱錦如輩爲文社  
乾隆九年知縣金鴻修縣志聘請分校卒年四十六子  
翔漢字鴻千庠生亦善詩文書法卒於山西

邵嗣宗字鴻箴爲諸生與毛詠齊名乾隆十七年會試  
進士第一改庶吉士授編修充 咸安宮總裁續文獻

通考纂修官二十五年考試差

欽定第一連充順

天鄉試及會試同考官所取多知名士擢右春坊右中允轉左陞侍讀微疾乞歸又二年卒嗣宗立志耿介重然諾勇於爲善至性敦篤事本生父母及嗣母極孝敬兄應錫字晉藩亦極友愛親既歿撫養嗣宗爲之延師娶室遺產俱推肥取瘠併代爲經理由是嗣宗得專心誦讀嘗應玉峯試風雨暴寒兄星夜攜衣走四十里人僉曰非是兄弗成是弟也

陸源字宗朝由拔貢生中乾隆十八年舉人三十七年挑發山東題補泗水縣決疑獄有嚴明聲邑東南地無井泉民苦遠汲相土脈坎之出泉得資汲飲葺書院延

名儒主講弦誦以興三十九年分校得士皆知名後改  
教職遷婺源訓導勤教育十餘年如一日移疾歸卒年  
六十有九

王青字去瑕廩貢生幼失怙比長能文尤肆力於詩古  
文嘗入山東學政幕中著有經史彙解曲臺要義諸書  
卒年五十有一

王宸字子凝原祁曾孫乾隆二十五年舉人後以會試  
薦卷取內閣中書俸滿選授武昌府同知擢湖南永州  
府知府皆以安靜爲治初太倉王氏承時敏原祁後子  
弟多以能畫聞而推宸爲巨擘性灑落修髯廣額滑稽  
談笑輒隱數人家素貧頗藉畫以供朝夕又嗜酒酒酣

落紙淋漓滿幅自以爲筆有神而腕有鬼也旣任永州  
是山水最勝處以造化爲師益造精妙世人得其片紙  
視爲秘寶宦輟所至督撫皆以筆墨屬之進 御屏扇  
多經其手然不屑以資干進乾隆五十八年致仕湖廣  
總督畢沅重其人留寓武昌閱四年而歿年七十八歲  
從弟宸字定九乾隆四十二年舉人性沉靜工詩文思  
力剴刻不爲凡語佐浙江學幕遊雁宕山愛其幽奇流  
連不忍去寓書兄宸作圖見志名人多題咏之卒年四  
十

陸觀宸字書宜州學生九歲能屬文嗜古尤耽詩與同  
里王瑜毛上哀朱璿多倡和嘗從沈起元王恭輩遊咸

相嘉許後嬰癆瘵病篤而詩益工卒年二十八其詩傳世

曾煜字亮工歲貢生少失怙家貧寄食於舅朱文照文照縣學生工詩文煜賴其教養得通文藝夙有書癖見異書傾脩脯購之喜吟咏興至筆隨又考字學剖析正謬力辨魚魯亥豕之失

馮偉字偉人乾隆三十六年舉人父懷璞字淳夫隱居嗜古善詩歌爲里黨所推偉少與兄俊同學年二十與兄同補州學生及兩上公車不第遂無進取意平居論道闡洛閩之秘晚學攝生術屏肉食卒年四十八  
顧王銘字鼎勲廩貢生幼讀三都兩京賦一二遍卽能

背誦肄業書院院長沈起元重之後以貢入成均師事  
邵嗣宗試京兆不遇在國子監肄業遽疾卒於京邸時  
年四十

許培秀字毓良國榮後祖璇字馨自有厚德鄉里推重  
以明經老培秀少失怙璇教育之讀書嗜古內行修潔  
爲詩清瘦如其人有竹韻軒詩鈔嘉定錢大昕序之中  
年貞疾韋布以終

鎮洋縣

國朝

顧栗字鶴年父鳳律字鳴六性樂易有孝行族子顧陳  
埤爲之傳栗爲文胎息六經尤長性理從游者悉有程



式嘉定知縣楊景曾慕其人使課子有以私事屬先容者拒弗與通卒年七十有二

汪溥字永思舊籍新安性孝友通經工詩古文常往來江浙遇名山水吟咏成帙晚年頗喜禪悅尤工山水師黃公望沈周孫廷璵貴誥贈榮祿大夫工部侍郎以畫進呈

御鑒列內府名蹟上等子之恒字蟾吉以年德推重鄉里

盛金慎字戒虞敬從孫縣學生窮經課徒游其門者取青衿掇科第至六十人將歲貢巡撫莊有恭閱其試冊歎爲名宿後部選黥縣訓導蒞任三載以老告歸卒年

八十有六

王賓字東膠雍正四年副榜充國學教習訓課有法祭酒奏留六年引見以知縣用選粵西懷遠時方勦義寧叛徭與懷遠接壤賓練兵給餉衆推其能旋以失察逸酋罷官越數年奉詔起廢權知瑞安授建德

與郡守爭一失入案復奪職先是粵西大吏聘爲秀峯院長及建德歸又聘主霍山書院先後教育士極盛賓制義規模先正詩仿長慶間爲倚聲初聘纂鎮洋縣志後復修太倉州志年已七十餘未竣事卒

聞棠字靜儒以五經中鄉試乾隆元年進士改庶吉士授編修歷典廣東湖北鄉試七年充會試同考官二十

八年回籍棠天才敏捷詩文華瞻成進士時試保和殿  
上閱卷列第二館選後遇廷試皆前列三年考  
試差第一充明史纂修使粵時道出合肥值大旱有司  
將諱之棠題詩館驛以諷邑令遂牒災請賑居家內行  
篤友誼雖無擔石見義必爲中道殂謝士論惜之

胡愷字民尊雍正十年舉人性英邁每作文以盛氣達  
之同里諸名宿交角藝文壇人爭推之十二年省試時  
新例以舉人充同考官偕同里王成應江西巡撫聘所  
取多知名士再上公車不第遂不赴處家和肅訓子姪  
以義方精書法兼善醫術卒年八十有三

張叙字濱璜雍正十年舉人乾隆元年以博學鴻詞徵

乾隆十六年舉經學皆報罷二十六年以耆年宿學

賜國子監學正生平沈潛理學穿穴經奧名重公卿  
間前後主講潞河蓮池白鹿洞諸書院成就人才甚多  
曾開四庫館當事以所著易貫詩貫二書進呈 命  
入提要總目其餘籍述俱詳藝文類卒年八十六子郝  
元乾隆三十年舉人

程穆衡字惟淳安徽休寧人父繼默始徙居州乾隆元  
年舉人明年成進士授山西榆社知縣邑多盜親縛其  
魁爲治勤約不病民然以耿介不合上官罷歸貧如諸  
生時一以著述自娛曾預修鎮洋縣志著有據梧齋詩  
文集又有周禮闡微禮經發覆夏小正注釋國語國策

注梅村集注又取太倉人詩集始於明偶桓訖於其曾祖其謨二百十人甄爲三十六卷凡遺民野老枯槁不傳者悉撰小傳以志顛末尤於先民有益惜未授梓

陸崑字柱天歲貢生貫穿經史教授鄉里隨材裁就高第弟子累累著籍性疎簡不治生產家無宿舂宴如也著作散佚弟子刊有息園遺文

王起鵬字萬南縣廩生父有輝監生有孝行工文詞起鵬宗其家學務爲根柢從沈起元游深器重之授徒里中及門多列賢書登仕版者孫文璐字介人性聰穎未弱冠應童子試學政胡高望試古學第一補州諸生侍郎王景主婁東書院授以詩法作五七言古詩能得唐

人門逕詞以姜夔張炎爲宗越二年卒年二十三朋好無不愍惜所著俱詳藝文類

朱錦如字伯霞少師事王恪得其真傳乾隆十六年成進士爲太平府學教授乞終養歸丁父憂服闋補常州府教授旋歸二十四年嘉定聘爲當湖書院山長時邑中姚成自海州儒學謝事歸居城東精舍而張錫爵亦以詩文名春秋佳日兩人皆集賦詩記事以爲樂錦如至性過人其詩清新俊逸雄壯博奧體製非一而清明念母扶櫬悲痛諸篇字字涕淚錫爵序之謂真發乎性情止乎忠孝者

吳桂字一萼高祖楨順治十六年進士父家銘監生桂

少而岐嶷補縣學生中乾隆十八年舉人選安徽潛山縣教諭其地山水盤互諸生僻處者無以親教誨桂乃取從前名宦及鄉之耆德可師者錄以啟迪之秀頑興起士風大變縣治沿大江水溢城不沒者三板縣令鍾文標適傷於臂桂代爲巡視晝夜繕守民賴安集以父母憚遠行不遂迎養乃乞歸丁內外艱哀瘁卒於家年六十一子本五十七年舉人

徐庾字罔懷家貧勵志讀書工詩文與修縣志嘗遊福建巡撫某羅致幕下偕入都堅辭歸旋敗一時服其先見中表王歲守廬州延爲上賓公餘相酌倡歿後無子稿散佚其見於城南五子者今亦亡

胡榕字安公乾隆十八年鄉試第一性沈靜寡言笑友愛尤篤三十一年授蕭縣教諭殷勤誨導多士翁服歲早知府檄捕蝗極力巡捕民德之爲詩詞意溫雅如其人同年王棗序之年七十二卒於任

毛上泉字羅照天麒元孫乾隆三十七年進士補內閣中書充武英殿分校復充方畧館一統志纂修官直軍機處

駕幸江浙山西盛京無不從晉戶部主事弱冠好詩已與同邑王瑜陸元邁朱璿金聚奎結詩社出入唐宋才情橫厲又工畫初效原祁既與王宸臨摹宋元名蹟出入變化獨自成家在中書時大學士劉統勲謂之曰



一卷青山送一年非君佳句耶其名重公卿間如此年五十一疾卒於京邸聚奎爲上哀內弟字宋端性伉直爲詩神似昌黎最爲沈光祿起元所賞後入監讀書亦卒於京

王璜字崑霞乾隆三十四年進士歷任內閣中書宗人府主事吏部考功驗封司員外郎充武英殿分校官四十二年充雲南副主考四十六年以四庫全書告竣議叙前後京宦二十年勤慎自持以清節著五十五年冬疾劇乞歸調攝漸復應湖北蘄州書院聘旋遘舊疾卒年五十有六性孝友與人交不設城府著晚香齋詩稿餘有枯崖書屋稊鈔多識編自怡編退食偶鈔佳興

錄未成

朱璿字子敬邑學生八歲孤母先卒事生母以孝聞績學好古士論推之乾隆三十三年副榜考取景山教習期滿引

見以知縣用四十一年

翠華東幸召試取二等

賜綵緞所進平川雅三篇選入

御府工行楷尤長

於吟咏蒼深雄厚游西安最久所過名蹟多以五七字寫之晚歲歸省因親老遂不復出未幾卒刻有崑崙山人詩四卷崇雅堂詩稿六卷餘藏於家

郁大鐸字英夫乾隆三十六年舉人長於制義踔厲清辨不名一家以攻苦遭疾卒於旅邸年三十九

吳玉韶榜名田玉宇湘洲乾隆三十六年舉人幼穎慧五歲識字十歲能文試輒前列一時有才子之目性落拓家貧壁立寡如也爲文雅麗亦工詩賦卒年四十三畢瀧字澗飛沅弟少工舉業應試失利沅爲入貲例選部郎意弗屑也性喜易工書畫善賞鑑於古器物及碑刻字畫輒能別其真贋所居曰廣堪齋非名人舊物屏勿御爐香茗椀坐忘日年六十五病卒

王鈞字奏韶少爲諸生試輒高等學政梁國治目以國士拔貢又以四庫館謄錄議叙選湖北道州州判嘗署臨湘沅江兩縣學攝長沙同知以廉靜稱旋移疾歸卒年六十一著石學詩草十卷

直隸太倉州志卷三十六終

人物 文學 三

直隸太倉州志卷三十七

人物

文學三

嘉定縣

元

王子昭居東練祁篤學好禮宋咸淳中爲本縣學正元  
初辟爲吳郡學道書院山長嘉定間學宮始建歲入田  
租不繼子昭已老病懼鄉校廢弛舍己田二十七頃有  
奇歸之學由是廩膳充足子昭有詩名學者稱東祁先  
生

秦輔之字道山隱居行義博學善詩文邑未有志輔之

始撰練川志又著格物擇善錄易經史斷武事要覽忠孝百詠散佚不盡傳

黃鉦字子相治春秋泰定四年由經學辟宜興州教授遷中議大夫常州路勸農總管

強珥字彥栗讀書工詩負奇氣早游京國徧交知名士值兵變歸隱學宮之旁時與秦昂阮孝思輩流連觴咏楊維禎常主之至正間薦授常熟州判官不就昂字文剛嘗以辟爲訓導

明

顧文煜字光遠嘗學詩於楊載清新婉麗得其家法元季以才辟鎮江掾明太祖下江南命監大軍倉從征陳

友諒以督運功授龍陽知州招附懷來民以休息改知  
秦和以祖母喪解任畱翰林議編大明律尋授廣東行  
省右司郎中洪武二年召拜吳王副相未行以他事註  
誤逮問得疾卒文煜吏粵均輸納安逋逃修城隍練士  
馬粵人德之祀名宦晚自號蔗境翁

王庚字景星由紹興遷居嘉定少受業於其鄉楊維禎  
通春秋學洪武十二年辟爲縣學訓導

王彞字常宗其先蜀人父允中爲崑山州學教授因著  
籍嘉定彞少孤貧讀書天台山中卽事王煒得蘭溪金  
履祥之傳故其學有端緒爲文抒所自得一裁於法不  
逐時好時楊維禎以文章雄視東南彞獨目爲文妖著

論詆之洪武三年徵修元史史成賜金幣遣還又薦入

翰林以母老乞歸後坐魏觀事論死爰之先本陳姓故

自號爲媯蜚子

明長洲高啟媯蜚子歌媯蜚子乃是軒轅之裔虞鰥之孫淳龐去已遠獨抱大

璞存籍伏在草野冥心究皇墳蚤達三光五岳之氣乍

分裂天狼下地砥血流渾渾渾鹿走秦中原蛇鬥鄭國門

狙豆棄草莽干戈歟崩奔媯蜚子便欲東游渡弱水沐

髮滄海朝陽盆又欲西行沂河漢踰崑崙山橫川阻兩

地俱不可往兮歸來掩戶卧旦昏蒔黍一區注醪一尊

妻給并日兒牧雞豚不詰曲以媚俗不偃蹇而凌尊作

爲古文詞言高氣醉溫手提數寸管放發理義根上探

孔孟心下弔屈賈魂魄其質輝金石其芳吐蘭蓀叩虛答

有響新險成無痕陸珍雜水怪變狀弗可論幾年兀兀

不肯出坐待真主應運九五開乾坤鶴書自天來幽隱

初見技使者遠造盧雞鳴起膏轄與纂金匱編尚書爲

給札奸魂泣幽塚筆下恐誅殺書成一代進紫宸驚燕

羽衛夾陸陳悶門導謂稱小臣麻衣不脫拜聖人捧匱

近前毀龍顏喜回春勅資內帑之金與綺段其文織作

銀麒麟蒙恩乞還家以奉白髮親戴古弁垂長紳自號

山澤之臞民媯蜚子幸際明良時無爲寂默坐老東海



涓青邱有客鈍且痴與爾欲結同襟期左鼓青瑟右吹  
鳴篴作歌共祝天子壽五風十雨萬國赤子同熙熙  
金文徵字德儒工古文詞洪武初辟爲本縣學訓導三  
年鄉薦第二勅免會試授鄆州同知有循良譽時同邑  
黃琮知中部常熟張著知膚施皆延安屬公餘酌唱名  
長安集遷國子學錄自號鵠居子從兄珉字德進元季  
訓導長洲洪武初爲國子助教亦有文名

袁銘字德新從長洲申屠衡授春秋學洪武間以經明  
行修舉召對稱旨授蘇州府訓導治經者宗之永樂三  
年同考應天鄉試識拔皆才雋將遷官卒於學署

鄭閔字以純少授易於元貢士嘉禾鮑恂學旣成崑山  
長吏聘爲訓導郡縣治易者多出其門洪武間薦授主

客郎中移疾歸

陳孜字克和通敏多識洪武間以薦舉試政行在兵部  
尚書張本稱爲倚馬萬言才補職方主事軍國機宜多  
所咨決時戎務滋弊爲民害孜撰軍政條例上之詔著  
爲令終工部郎中

張晟字翰宸有才名工書家隣佛寺嘗取佛經書之得  
晉人神妙洪武初辟署本縣學訓導入中書以撰慶賀  
表忤旨被逮死弟粹中字翰英國子生尤工草書同時  
趙某字元鼎亦以詩文著

鄭濟川洪武三十年以懷才抱德薦和御製思得賢人  
詩稱旨擢廣東道監察御史改北平布政司都事永樂

初引見賜冠帶致仕七年起署滁州事九年赴京仍致仕歸

宣嗣宗字彥初永樂中任中書舍人專書內制時楊士奇在內閣凡詔勅字句有未愜者嗣宗輒更定多所裨益扈從北征以淳謹受知後丁內艱特詔起復預修成祖實錄歷官驗封郎中卒於京邸勅有司護其喪歸諭祭于家贈戶部右侍郎

曾魯字希賢以明經薦授新寧伯教讀改訓導精於考訂嘗踵秦輔之重修邑志

周璇字仲幾讀書多識隱居教授喜爲詩

范騰字搏霄好學多聞大學士楊榮見所著述深器之

宣德間與陳述同舉賢良當事者難之曰一邑二賢將  
不勝舉矣或勸騰以賂進正色曰出處有命豈可以賄  
辱名器耶遂束裝南歸終身不仕子紳字朝儀行誼高  
潔不就辟舉工古文辭善行草八分小篆爲時所重  
潘暄字時暘詩文濡毫立就登正統二年進士官刑部  
郎中性疏簡伉直嘗爲同官所誣謫戍上谷宥歸放於  
詩酒或勸治生曰二疏何如人耶自號半散叟喜汲引  
後學才俊多出其門所居有頤節堂自爲記二子京密  
皆舉於鄉

馬軾字敬瞻精占驗工繪事正統間以天文生從都督  
董興征粵軍中夜半聞雞鳴興問何祥軾言雞鳴失時

當由刑罰不中宜申嚴軍令經清遠峽有白魚入舟曰  
賊授首矣時賊舟千艘列陣南岸勢甚猖獗興將進猶  
豫議請益兵軾曰兵貴神速請則緩不及事以兩粵狼  
兵取之如拉朽耳遂決戰大破之先是有大星夜隕軾  
言賊平近在四旬內無不神驗歸補漏刻博士其畫宗  
郭熙與錢塘戴文進齊名素善修撰岳正正謫欽州無  
敢送者軾獨爲詩贈之子愈字抑之天順八年進士官  
終南京刑部主事工詩善書縱佚不羈人號爲馬清癡  
章黼字道常隱居授徒博洽多識年三十病足遂絕意  
進取考訂六書訛謬潛心三十年集正體三萬餘字編  
韻學集成十三卷又直音七卷卒年八十僉事吳珣御

史劉魁知縣吳哲後爲梓行之

徐博字德宏與弟忭同舉於鄉博登成化二年進士知湘鄉縣尋擢監察御史巡視兩淮及期代者且至以歸省爲言官所劾左遷樂陵知縣改知巴東得心疾乞歸爲人豪邁善草書詩與松江張弼相伯仲

金濂字楫光江陵教諭洪之弟歲貢生爲人樸忠人有過輒正言折之長於史學嘗輯諸史會編一百十二卷歷四十年始成巡撫李充嗣梓行之又作歷年甲子圖宏治中仕爲象山訓導

洪子楷字式之天資穎特嘗與王鏊讀書古寺偶拈法華經循覽一周各能成誦督學御史戴珊歷校諸生獨

指楷文謂可與鰲相伯仲成化十一年會試鰲第一楷  
第二以負才中時忌出知涪州久之免官歸楷博學強  
記著述甚富家再被火無復存者

浦果字東白少孤貧嗜學聞有異書必購求鈔讀故其  
學該博邑有修纂輒果爲之人品高潔邑令王述方之  
林和靖爲治生壙年九十而終

翟校字啟英祥四世孫父深有孝行嘗負母出烈焰中  
校高覽博識嘗采邑人詩自宋天聖迄明宏治彙爲七  
卷名曰練音并志其人之名位事蹟數百年文獻得有  
所考由歲貢仕浙江平陽訓導卒於官

浦南金字伯兼嘉靖元年舉人詩文見重于時由歸安

直隸大名府志 卷三十一  
教諭擢國子助教當超遷旅見祭酒行步詳緩祭酒以爲嫌復以事忤選曹出爲唐邸教授時有同年在政府或勸以求援南金笑領之歲餘移疾歸知縣楊旦聘修邑志歿無餘貲故交賻之始克葬

趙中行字子與貌樸行淳以經濟自負上禦寇策於知縣多奇中嘉靖二十二年舉於鄉兩上公車不第有故人薦於嚴嵩云一晉謁卽得美官中行不應促裝南歸家居鶉衣藿食不廢吟咏遇倭警籌畫守禦之法甚備三十五年大祲條上賑卹事宜於部使者悉見施行子承易字繼川孫世熙字以寧俱諸生以文行稱

李士龍字應明平生修謹與物無忤嘉靖間由歲貢生



爲餘姚訓導調嘉興陞建寧教授告歸以書畫咏歌自適

朱用賓字獻夫有異才弱冠名重一時常授徒不肖子苦其嚴置毒食中遂瞽一夕夢見日光覺而兩目炯如乃復應舉登嘉靖三十一年舉人會試不第日疾又作日與子弟討論經傳爲人愷悌直諒好獎掖後進

黃通理字中伯其先自常熟徙於嘉定通理少苦學三十病瘵棄諸生隱居羅店以經學授里中從游者皆成知名士志行高潔儵然絕俗日坐一室中焚香啜茗以讀書自娛性和易來者熙熙如坐春風孫與堅

陳炎字上之父瞽以星卜所入資炎膏火炎讀書必至

夜分學極該博詩文俱成家爲人樸厚於物無忤而介  
節自不可易領萬歷元年鄉薦未仕卒

傅遜字元凱萬歷三年貢生由嵯縣訓導歷建昌教諭  
遷周藩長史少好讀書至老不倦其學長於論古今成  
敗師事歸有光文辭不及而持論嘗屈其師倭寇圍崑  
山請縋城出詣軍府告急竟得解圍尤好左氏春秋叅  
互攷訂以正杜氏之訛有春秋左傳屬事本末行世

陳可言字以忠以春秋名家好左氏傳嘗仿建安袁氏  
通鑑紀事本末作春秋經傳類事九十餘條爲三十六  
卷其釋義主杜氏而多所損益萬歷二十年始成後竟  
窮困以沒

張應武字茂仁情仲子年未壯卽棄諸生師事歸有光得史學之傳平生以經濟自負所著述皆切時務可見諸施行晚年由安亭卜居南城同邱集婁堅唐時升輩講學論古知縣韓浚修邑志發凡起例皆出其手爲詩清矯不羣子定安字仲慧負才早卒

金大有字伯謙嘉靖三十七年舉於鄉讀書修行爲名孝廉常爲里中無賴所訟已而其子以盜事發覺父并坐死大有知其冤白之於縣得釋一時鄉評耆德者必以大有爲首子兆登字子魚少敏悟工詩文舉萬歷十年鄉試十上公車不第授都察院都事淡於仕進奉母郊居先是計偕北上夜宿旅店亡其橐有司按治主家

兆登陰縱之曰吾不忍戕數口以完吾橐也長厚率類其父子德開德行竝以詩文名

湯珍字子重績學工文詞雅自標位爲人倫所推吳中前輩唐寅文徵仲皆友之爲詩社楞伽山中後進稱能詩者多從問業文休承壽承彭孔嘉其著者也其後巡按御史卽結社之地建祠祀珍及諸子其中置祭田歲時伏臘焉

陳舜道字見華萬歷三十五年由彭澤教諭成進上例選知縣舜道不欲偃僂事上官仍補應天府學教授久之擢部曹浮沈郎署間甚久俸滿選柳州知府州故瘴鄉前代以居流人舜道獨恬之未幾致仕歸靜坐斗室

焚香讀易人服其清節

徐允祿字女廉瑄五世孫年十五就童子試郡守賞其  
文謂與奇童李名芳沈紹侃並驅三人皆嘉定人也補  
郡庠生每一文出遠近爭傳誦之平生邃於經學初爲  
易說旁治毛詩尚書又理春秋三傳作史論自周威烈  
王起至元順帝止嘗試京兆被黜時王錫爵父子謂目  
前無此人而允祿自安時命終無一言借其推挽老困  
諸生家甚貧一介不苟取所善友曰張表朱稚美劉維  
藩皆獨行之士表字君日爲文溫淳典雅而志節嶢然  
或冬月不能著絮家唯一婢所親負豪家錢卽鬻以代  
償維藩字价伯好古執禮丹鉛不倦兼通歷律堪輿陰

陽述數別纂歷代事成書至數百卷雅美自有傳

沈宏正字公路性至孝母喪三年不御酒肉久次諸生  
絕意仕進天啟初詔求巖穴之材大臣疏薦謝不應爲  
園十畝有水石竹林之勝詞客酒人常滿座性喜聚書  
所藏多善本晚以病杜門謝客殫思著述詳藝文類

唐時升字叔達父欽堯字道虔事母孝與弱弟友愛爲  
人倜儻多大畧學瞻氣豪由貢生選撫州訓導未任卒  
時升少孤有異才年未三十謝去舉子業讀書汲古志  
大而論高嘗以李德裕自期王錫爵執政時升偕其子  
衡讀書縱論天下事凡兵農錢穀具言始終沿革時東  
西構兵萬里外羽書旁午獨逆料情形無不奇中衡問

何以知之時升曰吾觀古人事固有類此者竊意之耳  
詩才雄健古文師法歸有光知縣謝三賓合婁子柔李  
長蘅程孟陽詩文刊之號嘉定四君集

婁堅字子柔經明行修學者推爲大師年五十貢於春  
官不仕而歸其師友皆出有光之門傳其道以教授後  
生箴砭俗學具有條理書法亦學大蘇尺牘寸簡人爭  
傳購

周道隆字從隆父用中字子行以明經選青陽訓導遷  
浙江太平教諭淮安教授道隆少力學中萬歷三十一  
年舉人在青陽時聞父病棄官歸後令宜章民徭雜處  
苦心安輯莫不柔服值歲飢賑廩千斛秩滿行取民徭

皆泣送授大理評事累遷刑部郎中獄多平反卒於官  
唐景亮字明仲萬歷三十一年舉人任太和教諭陞南  
京國子學錄歷大理寺評事都察院司務陞南京車駕  
司員外郎遷職方郎中邊事告急羣議簡卒登陲景亮  
謂五方雜處之地家無宿糧勿張皇致擾大司馬深然  
之出知延平府在任八月移疾歸景亮秉性清介通籍  
十二年未嘗受私謁解組後與弟景南構玉蘭堂讀書  
其中日相酌倡

李流芳字長蘅舉萬歷三十四年鄉試天啟二年魏忠  
賢等璫焰方張公車抵近郊賦詩而返遂絕意進取平  
生孝友與人交周旋患難傾身救援無所避家貧資修



脯以養母稍羸則以分窮交寒士性好佳山水中歲於  
西湖尤數其書法規樵東坡畫近吳仲圭詩則信筆抒  
寫持擇在斜川香山間家有檀園樹石皆手自位置卽  
以名其集伯兄元芳字茂初邑諸生仲兄名芳字茂才  
十餘歲已能馳騁文詞試宜興知縣聞其異才面試之  
頃刻數千言更命賦七言詩以爲王子安李長吉之流  
年二十八登萬歷二十年進士授庶吉士明年卒子宜  
之子緇仲才敏而瞻流芳子杭之字僧筏諸生亦工詩  
畫

鄭允驥字閑孟博聞強記詩長於五言古兀寡頓挫所  
交皆知名士尤與李流芳善時以李鄭並稱爲諸生不

得志縱酒自放而沒弟允驂字彥逸亦能文

汪明際字無際少孤力學事母以孝聞撫弟妹友愛年弱冠名籍甚精易數旁通詩畫萬歷四十六年舉於鄉屢困公車謁選得壽昌教諭讀書魏萬山房倡導古學僻邑風移由國子學錄歷都察院司務陞工部主事晉員外郎後以同官誤工廷杖以死子彥隨字子肩崇禎六年舉人痛父冤沒扶櫬歸葬終身廬墓

王道通字晉卿邑諸生負經濟才雅不欲以文章名而文極古茂師沈賓喪衰麻三年入其室終身不敢正坐居親喪邑令謝三賓往訪之道通辭固請乃接兄終不易服

嚴衍字永思邑諸生父景陵字伯阜勤學好古工舉子業行精史學以司馬氏通鑑中多疎漏作通鑑補五百卷閱三十年始成詩文渾灝有蘇氏風書法褚米作擘窠大字更奇偉爲人篤誠鄉里尊爲大師門人談允厚績學工文衍以妹妻之衍幼子恒字久持亦工詩能書沈宏之字茂之深於史術凡九邊要害抵掌如在心目曾入袁崇煥幕已而館馮銓家輯武事全書書成進御族弟延揚建行海運策宏之與有力焉尋歸老不復出卒年八十有二臨歿手不釋卷族弟徵佺能紹其緒著

### 江東志

蘇時麟字泰醇終身無欺人語故人盜其室中物去後

復至子弟不禮之時麟曰彼以貧故爲此何得傷親誼也家貧鬻產以延師曰以產貽子孫不如以詩書貽之也明季徭役甚重不令其子赴公門曰秀才一入公門不獨學費兼氣卑而顏厚矣季子淵崇禎十五年舉於鄉

張鴻磐字子石任從孫蚤慧遍遊鄉先進之門書法蒼勁詩古文詞皆有指授崇禎季年伏闕請漕糧永折尙書徐石麟器其才欲薦之力辭不就浮湛詩酒間年八十餘歿

朱子素字九初事母以孝聞隱居授徒承故老凋殘之後慨然以斯文爲己任著吳騷文獻歷代遺民錄以見

意

馬元調字與甫上海諸生徙居嘉定南城五歲時聞張應武邱集論說輒矻聽不移足已受學於婁堅洞悉經史源流凡古今典制名物靡不淹貫每閱一書必購別本校勘點畫之訛一一改正學者稱簡堂先生後與侯峒曾黃淳耀等守城城破時遇兵死入忠義祠

趙世熙字以寧邑諸生中行孫早有文譽負經濟邑中爭區折漕官布白糧諸大務抗論多持平崇禎四年歲祲復漕議起世熙力言於當事謂嘉定不但無米卽十萬糠粃亦不能辦隨改麥折次年又力爭之漕并得折于萼字九英補諸生工文詞亦饒經濟謂末俗澆訛在

章服無別權度不齊又謂營汛無事督令治附近河渠  
可以闢荒土練軍實軍官以督捕有功者陞補故縱有  
罰則盜自無所容持論皆切時用旁通天文六壬奇門  
醫卜青烏家言等子俞見列傳

孫繼統字續之少讀書負奇磊落與兄繼緒同補邑庠  
生嗣以子元化貴絕意進取肆力於詩及元化巡撫登  
萊迎養峻却之已而遼兵果畔若逆料其有變也年八  
十一終

張昉字朗初祖由父士美俱能詩昉幼承遺澤鏤學臈  
行朱樵創社東岡延陳瑚朱士儼主之昉偕從子垕入  
社切劘風雅同社服之梓祖父詩行世生平喜潔嗜茶

自號耐菴年八十餘卒

國朝

侯開國初名榮字大年泖子少負軼才受業陸元輔經史子集累朝典故目營手鈔幾忘寢食不求仕進常欲築山房以鳳阿名之爲終老計繪圖索四方名士題詩盈卷然以貧故卒未能卜築也其文冲和峻潔詩雄深樸老晚集吳嘯文鈔未就而卒事繼母莫氏孝撫異母弟有恩子銓永皆諸生工詩文能世其家

陸時隆字道協父禹定有義行門人謚以元憲時隆年十三而孤母鄒氏訓育有成克繼家學文詞高瞻精易義尤留心經濟之學以心術風教爲己任及崇禎末時

時畫沙聚米曰天下未寧苟有用我其可無備耶又慨  
民生凋敝曰我縱不練五千人提偏師搗賊穴亦當爲  
都水庸田使使青齊遼海所在墾荒用寬東南民力以  
文章好奇屢不得志 國初吳門故友復興社事時隆  
寓書吳兆寬等諄諄以流弊爲戒已而見文昌入貫索  
惄然憂之未幾科場獄起又未幾奏銷令行自是終年  
閉關蕭然高寄常謂經濟之道有三十年而後成者一  
曰復古枝以養人才有三年而後奏效者二曰嚴考課  
以清仕途本鄉俗以平賦役有旦夕不可遲者四曰停  
預徵以培國脉表忠節以勵臣工汰吏胥以絕蠹弊撤  
海禁以通貨財時論迂之時隆自少至老未嘗一日廢



書比年鈔錄皆發明義理農政水利兵法有繫國體民生者潛居小圃躬自芟草灌畦歲入江灘田四十畝半以購書鶉衣藿食恬然無動於中有友託五百金避亂轉徙卒完其金以還之自號郭亭蓋慕郭林宗之能知人好獎拔士類云

何平字匡山先世居婁塘明中葉徙居京師從祖遜萬歷十一年進士令臨潁南昌二縣擢監察御史伉直敢言贈光祿寺少卿平工詩崇禎十三年成進士任高密知縣入國朝歷官福建參議道旋罷官攜家歸故里王晦字服尹又字樹百秦際孫翊子晦少稟家學與趙俞孫致彌侯開國輩稱膠城八子年五十一始舉鄉試

六十七成進士授庶吉士明年子敬銘登第遂告歸晦  
持已謙和與人交不立崖岸於文尤長儷體不事摺摭  
而條理秩然其詩則體源蘇陸焉敬銘字丹思由諸生  
入太學迎 鑾進詩畫稱 旨供奉內廷康熙五十  
二年以殿試第一人授修撰五十四年充會試同考官  
五十六年主試江西爲詩清新婉麗畫宗宋元人先後  
侍直十年甚沐 寵遇五十八年父母年皆七十有

四 聖祖親書齊年堂額 賜之丁外艱歸尋卒弟  
輔銘字翌思縣庠生工詞章好搜輯邑人詩文以翟校  
練音集尙多遺漏且其書久無續之者因哀集宋元明  
及 國朝諸先輩詩爲練音集補明練音續集 國朝

練音初集三書梓行里人之能詩者咸賴以傳

聞選字若韓原籍崑山授經來嘉定補邑諸生遂家西城順治十五年進士坦懷質行與人交洞見肺腑文有根柢長洲汪琬亟稱之年七十四卒

李煥字雒文原籍新安詩文與弟燧齊名結社南翔著有榮園草燧字先五陸元輔稱其詩清妍和雅集若干卷陸隴其序之

許自俊字子位父大達多隱德自俊康熙九年成進士闡中得其文以爲年少高才及拆卷乃崇禎六年舉人至是三十八年年已七十矣又九年舉博學鴻詞報罷授山西聞喜縣令分校鄉試尋乞歸又三年卒年八十

四自俊記誦該洽詩文絢爛傾動一時事父孝構遲日草堂爲父招老友時尋壺觴花藥之樂里有老萊之目周陳俶字義扶其先常熟人母陳氏遺腹生俶育於外家因蒙陳姓甫弱冠爲嘉定諸生崇禎十五年舉鄉試第二又三十年與許自俊同登進士並負文章宿望時稱膠城二老俶爲詩有陶白風性篤孝嘗遇兵負母行風雨泥淖中以免名其堂曰錦娛有遺集藏於家

蘇淵字眉聲幼善屬文人未有知者爲侯峒曾所賞名乃起崇禎十五年舉於鄉國朝爲碭山教諭兄澆諸生性至孝從弟澍亦諸生繼翟校之後著續練音集吳盤字又新監生從父某字際明少貢成均以軍功任

五城兵馬司忤權貴左遷山東日照縣丞盤嘗授經平湖陸隴其從之問字及隴其任嘉定知縣延之幕中旋卒

邵琪字隆吉諸生性行端慤淹通經傳負笈者甚衆同時諸生汪价字介人博學多著述並居西城

朱廷選字掄生少有文名試輒第一順治十六年歲貢生淹通古籍門弟子四方來學者不下數百人晚年與同邑許自俊汪价輩陶情詩酒年八十有五卒門人私諡靖文

吳屯侯字符奇少習韜鈴雋武闥已復棄去補邑諸生詩歌博雅工練從弟諸生莊字茂含能爲古文詞隱於

醫

孫致彌字愷似元化孫和斗子家貧好學才情藻逸康熙十七年上和御製詩四十韻稱旨遂以太

學生假二品服爲朝鮮副使購藏書是年中鄉試與修

幸魯盛典二十七年成進士選庶吉士旋以編讀

議獄樂不免閱十年盛典告成得復職四十一年典山

西鄉試授編修尋充

佩文韻府總裁歷官至翰林

院侍讀學士其纂修勤且久考核詳慎書垂成而卒

賜金以殮勅內務府護喪歸里生平著述甚富詩詞

皆清新宏瞻爲人慷慨樂易好獎掖後進有前輩風

浦鷗字浪臣負氣稟兀中年始學詩筆力豪放陸隴其

卒鵠汲吳淞江第六泉走至其家哭而奠之曰我公在嘉定惟飲此水也

瞿有恒字聖基康熙二十年歲貢生選授池州府訓導善誘循循士心悅服後陞和州學正令郡諸生攀轅祖道聯句四十韻并繪圖送別乾隆六十年曾孫兆麟攝池州府知府更以詩勒石立於學宮

俞煒字彤友苦志耽吟爲童子師佐饒以歿王輔銘選其詩入練音集

時炳字用咸原名來偕行孫九歲能文十一歲補諸生後以奏銷罣誤其學務求根柢先世藏書散佚就人借鈔寒暑不輟積成至百卷具知人鑑所獎者後輒成名

兄采字去華性曠適晚歲家落至不能具炊詩益工炳  
子圯授字期五有文行康熙四十一年順天舉人未仕  
卒次子敘字星爲諸生

張僧乙字西又明叅政恒曾孫早棄諸生服蕭然高寄  
家極貧老屋一椽僅蔽風雨日吟咏其中詩句清曠脫  
盡塵俗又工繪事畫畢題詩其上書法亦颯颯有致圖  
章皆自篆刻人稱四絕

張大受字日容原籍崇明遷嘉定後徙長洲父慶孫順  
治十一年舉人廬於匠門溪上聚徒授書學者稱履素  
先生大受弱冠補崇明庠生以文受知韓莢康熙二十  
九年舉於鄉是科江南得人最盛而大受聞墨傳誦天



下四方造門講業者無虛日大受亦勤於接引臨川李  
紱未第時聞其名徒步二千里踵門受學四十八年成  
進士選庶吉士授檢討五十九年主四川鄉試比還奉

命視學貴州黔中荒陋大受教以讀書之法設書  
院義學爲置田資膏火拔士之尤者給之風氣爲之一  
變以疾卒於官大受詩文超雋人尤愛其駢體有匠門  
書屋文集弟士琦字天申以嘉定籍中康熙二十三年  
副榜知永新縣有善政坐事去官民爲罷市亦能詩從  
孫詩字原雅廩貢生詩文雜藝皆工敏

歸梁字孟游子顧曾孫性敏好學工詩文授徒所得修  
脯悉以供父與庶母甘臚偕諸弟終身不析產康熙六

年舉人就宜興教諭卒於官

李實字玉如幼嘗割股療親病繼文修行知縣陸隴其試童子閱其文曰是必潛心理學者拔第一補諸生後得其指授益務實學爲入室弟子著有學庸順文一編以是二書支分節解先隨文解意而後及其精微隴其深許可之子錫秦別有傳

徐德餘字摩似縣庠生爲文縱橫灝瀚試輒冠曹偶湯斌張伯行先後撫吳並加賞拔縣令舉鄉飲賓辭不赴年六十四卒陸宗維作傳王澍志其墓

顏鑄字懋明增生與弟饋並工詩家有藏書數千卷兄弟自相師友學識淹貫饋字懋簡太學生饋子秀洪亦

與弟向濤同務根柢之學爲名廩生

周宗泰字文濤道隆孫諸生教授里中數十年從游者日進以所得修脯聚書手自校錄晚年尤粹於宋道學家言

范逸字遺民居黃渡與范超不同族而同里同業醫同以詩名時號二范逸博學年未五十以盲廢猶爲童子師口授經書無舛錯者又同里顧荃字香王亦善詩古文詞尤長於賦家酷貧屢絕食以佗僚失意死

施燧字舊石爲庠生試輒冠軍

聖祖南巡獻詩獲選雍正元年黃叔琳典試江南燧中副榜深以爲憾延至京訓其子

劉幹字上旋雍正二年進士性慤直語無委曲爲諸生時布衣蔬食沈浸經史有所得必書而記之選安徽涇縣知縣未幾罷歸

侯瑞隆字符五雍正四年舉人自幼力學詩古文詞信筆直書不假雕琢而典瞻可誦晚授宜興教諭未任卒秦立字雲津諸生性行端慤與人交外和而中介教授生徒矩範整肅立爲輔之十三世孫留心邑乘著練川野錄

符兆昌字匡世淹貫經史名重一時張雲章稱其文踔厲風發詩歌清遠閒放與李際鼎俱以學行爲人師云趙虹字飲谷布衣工詩詞尤勝遊廣東河南及揚州最

久屢爲諸侯上客年七十餘倦游依其從子於蘇州以卒

錢王炯字青文邑學生嘗謂讀書必先識字故於四聲清濁辨別無少譌溷于四部書無所不究旁及卜筮祿命之術惟不喜二氏學嘗云仙言長生佛言不滅二者皆未可信夫神依形以立未有形去而神存者今二氏之徒遍天下卒無一人能見古仙古佛者則長生非生不滅乃滅也孔子言疾沒世而名不稱立德立功立言吾儒之不朽卽吾儒之長生不滅也事父母孝兄早歿撫孤姪使成立叔修宗譜斷自遷嘉定之祖爲始而不附貴冑蓋其慎也幼從太倉李景初課誦李歿無子迎

其妻黃氏敬養三十餘年歿爲制服葬而除之歲時必設位致祭焉乾隆二十三年有司舉行鄉飲禮延爲大賓知縣介玉濤問何以致壽答曰某生平不知導引服餌之術但文字外無他好未嘗輕易喜怒耳卒年九十有二 誥贈奉政大夫翰林院侍讀子桂發字芳五邑學生少承庭訓以讀書立品爲務及子大昕通籍遂絕意仕 當事重其名往往造廬問與居自報謁外不更至遇子弟質美者必教以兼通古學勿蹈科舉空疏之弊又創議立宗祠年已及耄猶率子弟行禮無倦容易簣之日遺命不作佛事卒年七十有九 誥授奉政大夫翰林院侍讀 晉贈中憲大夫詹事府少詹事

殷塏字元爽都元孫也性廉潔好交游受業張陳典門下與張雲章陸宗濂友善已而棄舉子業肆情吟咏所作詩多幽愁鬱結之句尤喜前言徃行暇則手自鈔錄不少輟有問邑中故事必備舉其人之爵里姓氏源流本末以答之人稱爲嘉定人物志卒年七十九弟某嗜筆墨嘗集明末諸名人與李流芳往來簡札裝爲一冊早卒

張禮字儼思大受從孫修行續文館寶山巨室曾其家難禮多方調護之弟詩字原雅廩貢生詩文雜藝皆工著何菴集

張揆芳字道管雲章季子幼承家學與同里張觀光張

鵬翀張錫爵崑山朱厚章結詩文社酌倡無虛日康熙五十六年順天鄉試舉人授直隸任邱縣知縣以耳疾休致歸田後閉戶數十年所著甚富

湯咸一字希尹自少卽以孝行稱於鄉雍正十三年副榜同里張鵬翀招之入都攜其文示黃叔琳一見驚異延至家使課諸子家貧急於祿養考授覺羅學教習丁艱歸乃嘆曰今爲鮮民干祿何爲遂絕意仕進杜門教授來學者以百數

王紳字箴錄恩貢生幼從世父世極學制義出入經史文名甚噪及子處厚成進士遂閉門授徒處厚官穎上屢迎養不往年八十餘猶能作蠅頭書處厚字大敦乾



隆二十二年進士任知縣多惠政次子處道三子處恭  
縣學生

石球字鳴虞邑庠生性篤孝中歲沈酣經籍築室三楹  
讀書其中授諸弟經以力學篤行相敦勉與張鵬翀同  
學及鵬翀貴徒步往見之執手甚歡憐其貧勸之游燕  
謂可作居停主球曰小生乃欲相吏耶晚益務求古人  
精義爲詩直抒性情從容閒淡

王爾達字通侯明司業同祖七世孫工文長於吟咏與  
朱厚章張揆方齊名弱冠補縣諸生食餼卒年七十有  
六性坦易安貧樂善多聞舊事爲門弟子談衮衮不休  
子鳴盛出嗣伯兄見列傳次鳴韶字鶴谿新陽縣學生

少而明敏習古文兼工詩畫兄奇其才責以舉業鳴韶  
謂人曰兄固愛我不知我心已淡也鳴盛官翰林鳴  
韶獨晨昏侍父母閉戶讀書額其堂曰逸野旁闢一室  
縣簑笠以見志嘗自作簑笠軒圖少詹錢大昕視學廣  
東邀與偕往途中遇名勝必往游有記程詩若干卷及  
歸遂於逸野堂授徒終老鳴盛次江左十二子詩以韶  
居其一論者不以爲私

曹桂芳字丹五本姓杭九世祖維德撫於舅曹氏故冒  
其姓五世祖元叟以善行聞於鄉兩舉鄉飲大賓桂芳  
少補邑諸生工制義從游者甚衆少詹事錢大昕其弟  
子也中歲無意進取而性喜讀書至老不懈餘則力行

善事明邑令朱廷益以議改折漕有德於民祠廢重新之卒年七十六子仁虎已見列傳

張錫爵字擔伯欽明孫弱冠與同宗鵬翀揆方及朱厚章相酌唱補吳江縣庠生以例入成均屢困南北鄉試而所作詩益奇沈德潛見之嘆賞不置中年後絕意仕進閉戶著述自號鈍閑詩老卒年八十二孫璉字器之號梅泉縣庠生工詩善畫年四十五卒

趙丕烈字奇三俞之孫邑諸生嗜古精研易學兄銘乾隆六年拔貢生鏡寶山縣庠生兄弟俱負雋才金壇王步青選時文與同邑朱桓俱加激賞乾隆二十七年南巡進詩畫 賜緞匹子曉榮廩貢生國榮邑諸生所

著俱詳藝文類

張陳典字徵五本姓陳乾隆元年進士任貴州銅仁知縣以廉能稱積勞邁疾年六十二卒於官陳典九歲能文華亭周夔慕其名延注韓杜二家詩雍正九年爲舉人時應廣東總督郝玉麟巡撫傅泰分纂通志後縣令程國棟修縣志人物諸傳稿半屬之生平好吟咏工詩古文詞旁溢爲繪事子令侯字庭碩廩監生博學能文工駢體歌行

金鳳綬字藻若監生洪銓子兄鳳綸字翰豐乾隆元年舉人十年登明通榜入貲授翰林院待詔鳳綬幼敏慧尤長駢體生平淡于進取喜黃老家言又著賦述條析

漢魏六朝宗派子慰祖字繩武有雋才四十二年拔貢  
未 廷試卒

陸遵書字芙苑孝廉縉孫少與兄授詩齊名授詩字倉  
雅弱冠補縣學生工詩文善畫雜技無不能者乾隆十  
六年 南巡獻詩取二等旋卒遵書以廩貢生二十四  
年鄉試中式二十七年 南巡獻詩畫冊 召入都直  
內廷如意館多見宋元真蹟畫益進如倪迂師子林圖  
奉 勅臨摹又得尚書董邦達指授故其落筆與時迥  
異後南歸愛洞庭山水之勝往游經歲山僧野老持練  
素乞無不應者俗人不屑也詩亦有香山劍南之趣又  
嘗主講東昌書院後選會同知縣未之任卒於京邸年

六十七

秦大成字承緒五歲而孤家貧母勤紡績以資誦讀從祖倬常以大器期之乾隆二十八年成進士廷試第一授翰林修撰時母已大耋請省南還綵衣稱慶閭里榮之假滿奉母入都又以母不習水土多病請歸終養歷主瀛洲婁東平江書院藉修脯以供甘旨母歿服闋入都充國史館纂修四十三年充會試同考官明年充鄉試磨勘患痰疾乞假回籍總督薩載聘長鍾山書院修南巡盛典四十八年九月以疾卒於家大成潛心濂洛闢閩之書而旁參釋老家言立功過格以自勵好施與晚年貧益甚至饋粥不繼親舊有空乏必謀周

給焉母喜誦金剛經遂采釋典作注疏所著詳藝文類  
張允武字熙若縣學生明江西叅政恒之後長身玉立  
工詩文尤善駢體年五十餘卒所著海樵詩鈔賦稿注  
查慎行敬業堂集俱藏於弟子家

金曰追字對揚歲貢生爲人端慤誠樸博學能文尤深  
經義著十三經注疏正譌其儀禮正譌已刊行世

秦嚴玉字范成幼嗜學長工詩文善小楷乾隆三十三年  
舉人任安徽定遠訓導卒於官

陳時敘字虞百乾隆三十四年進士以知縣用投牒就  
教選安慶府教授蒞任後課獎諸生數年間相繼登甲  
乙榜者十餘人子弟來學者亦多所成就歲七十力請

告歸方唐叔達約南翔八老會見者謂神仙中人卒年八十有二

俞昌言初名朱衣字范甄乾隆三十六年會試中式四十年補殿試以知縣用自請補教職選蘇州府教授少多病偕秦大成學導引之術及爲校官又與彭紹升爲禪學然教人有法身被者品節自勵論文師歸有光淳古簡潔詩則得之陶韋爲多卒於官年五十四

錢塘字學淵拔貢生乾隆四十五年成進士以知縣用請就教選江寧府教授委監鳳池鍾山兩書院四十九年纂修南巡盛典塘惴惴無華醞釀經史通注疏集金石精推步明樂律與同邑王鳴盛叔大昭弟埜同



爲根柢之學所著春秋三傳釋疑述古錄後漢書律歷  
志補注淮南天文訓補注易緯稽覽圖攷類官雅樂譜  
漑亭文錄漑亭偶存四益齋詩鈔搜奇嗜博馳會貫通  
非俗學所能津逮也年五十六卒於學舍

汪炤初名景龍字翌青廩貢生少能詩通經義覃心金  
石之學注大戴禮數萬言又纂集齊魯韓三家詩說凡  
見於唐以前書者片字必錄人服其博瞻性情安雅與  
物無忤兵部侍郎王杰任浙江學政禮部侍郎沈初任  
福建學政皆屬以衡文繼從杰游西安歷主有莘橫渠  
兩書院山長按察使王昶招入幕與知縣申兆定州判  
錢坫編次金石彙編所見益富炤又工隸書如臨潼橫

渠張子祠堂記崇福寺羅漢堂記皆其所書歸未幾年  
五十八病歿先是炤以詩名吳下光祿寺卿王鳴盛選  
炤詩暨嘉定寶山詩人林大中顧鑄王鳴韶諸廷槐王  
元勳印照王丕烈張允武錢塘毛思正張崇慤凡十二  
家詩刻之衆謂炤詩最工大中字協君嘉定歲貢生才  
侖儻詩磊落以振奇中年忤縣令逸至青浦友邵玘匿  
於家久之會令遷去乃得歸然終不遇以卒鑄字金祥  
以縣監生入貲選廣西慶遠縣經歷著黔中游草又善  
推步著歷學彙編十卷照字滙宗乾隆三十五年舉人  
有菽園詩稿皆前歿鳴韶允武塘別有傳餘皆存  
陳曦字躍雲幼工吟咏與林大中等齊名由附貢生充

四庫館膳錄議敘州同以母老不就職性仁厚鄰里有告貸者勉應之不責償嘗以產業屬弟曜倡修寺宇罄所貲無吝色至窮約以終

程萬里字雲翼縣廩貢生性古拙工詩文尤長楚詞於東漢王逸南宋洪朱注釋外別有神解山長許廷鑠沈起元主講時稱爲老宿四薦棘闈不售後入監肄業卒於京遺稿散佚

直隸太倉州志卷三十七終